

## Á MESA DO PARLAMENTO

O **Grupo Parlamentario En Marea**, a iniciativa da súa deputada **Paula Vázquez Verao** e a través do seu voceiro **Luís Villares Naveira**, ao abeiro do disposto no artigo 160 do Regulamento da Cámara, presenta a seguinte **Proposición non de lei** para o seu debate en **Pleno**.

### EXPOSICIÓN DE MOTIVOS

A veciñanza do barrio da Ponte, en Chantada, así como a Asociación de Empresarios de Chantada e outros colectivos, denuncian a excesiva presión de tránsito de vehículos por unha zona estreita.

Deste xeito, propúxose que se realizase unha nova ponte para cruzar o río, e así poder peonalizar o barrio, pois, na actualidade, só se pode circular pola Estrada da Ponte, que continúa na LU-P-1801 e que, a pesar do seu pequeno tamaño, é de dobre sentido. Esta vía é a conexión das parroquias do Convento e Camporramiro con Chantada, alén de ser o acceso principal á vila de oito freguesías e de ter un acceso á N-540, converténdose nun dos principais puntos de conxestión do tráfico do Concello.

Ademais do tránsito e deambular a pé propio da veciñanza da zona, súmase o movemento propio de turistas, nomeadamente de peregrinas e peregrinos, ao pasar polo lugar o Camiño de Inverno. Trátase tamén dunha zona de relevancia para Chantada, como é a alameda, e para visitar a igrexa e o mosteiro de San Salvador de Asma, recentemente declarados Bens de Interese Cultural.

Para superar esta problemática, a maioría da veciñanza solicita a construción dunha nova ponte dende o Convento ata Chantada onde se atopa o transformador





de Fenosa. Deste xeito, melloraríase o atractivo do conxunto do barrio, ademais de facilitar o goce para a cidadanía do seu patrimonio histórico e cultural. A súa edificación eliminaría os atascos que se producen en determinadas horas; asemade, melloraríase a seguridade viaria en toda a zona.

A veciñanza afectada reuniuse coa Deputación de Lugo para trasladar a oposición a un proxecto de regulación do tránsito mediante semáforos, ao cal tamén fixera alegacións e sobre o que enviaran queixa á Valeduría do Pobo. Tras esta xuntanza, a Deputación freou o seu plan e deu a razón aos colectivos prexudicados, sinalando que se precisaría a colaboración do Concello e autorización da Confederación Hidrográfica.

Tanto a protección do Patrimonio como a promoción turística ou as obras públicas son competencias da Xunta de Galicia.

No PXOU de Chantada xa se contempla a construción dunha nova ponte sobre o Asma.

Polo exposto, o Grupo Parlamentario de En Marea formula a seguinte Proposición non de lei para o seu debate en Pleno.

O Parlamento de Galicia insta á Xunta de Galicia a:

1. Poñerse en contacto coa veciñanza dos barrios da Ponte e do Convento para coñecer as súas reivindicacións.
2. Colaborar coa Deputación de Lugo e o Concello de Chantada para a construción dunha nova ponte para o tránsito sobre o Asma.

Santiago de Compostela, 27 de marzo de 2019.





Asdo.: Paula Vázquez Verao

Deputada do G.P. de En Marea

Luís Villares Naveira

Voceiro do G.P. de En Marea.

**Asinado dixitalmente por:**

**Paula Vázquez Verao na data 27/03/2019 10:06:33**

**Luis Villares Naveira na data 27/03/2019 10:06:41**

